

## Tesaldónikaxa zaldakuetshi kasak ne kalta zũngajienapanaldiamak

Meja ai kalta gauwane: Pábulduki Duwe Jesúja aji múldigaba guaxal gaxaneja jalde kaltaki gauwane. Akldé Pábuldu shaldaga miñkualdaldiamake “Aldumaxa zaldakuetshi kalta zũngajienapanaldiamak” gaune tuakue.

Mekuetshi kalta gauwane: Pábulduja Duwe Jesús ipanane kuíbuldu Tesaldónikaxa ishjuizhaldekakue jalde kalta kagakauwane. Tesaldónikaki Masedonia baxe kuíbuldu akldé akzé, balkukue izhañkajeñka nuka. Pábulduja mutshuane san san kuíbuldu Duwe shalda guashi neyatogueñ Tesaldónikaxa jiaga ekíga guakldane (Ajsh 17.1-9). Exaki axaña asaná juldiúkue ajuizhaldegeñka Duwe zũnekuane shalda shi kaxaldiyatshakna, asaná exa zaldakueja misha Duwe iyapaná (Ajsh 17.1-9). Aldiweki asaná naldagáldekue jiaga matshuwi Duwe iyapaná. Nalguakna jalde kakuzgauwatshake juldiú saná naldagáldekue Duwe iyapanane akldé ashekuane (1.9-10; Ajsh 17.4).

Jinak ai kalta gauwane: Pábulduki axaña Tesaldónika shi kaxaldiyatogueñki, Duwe zũnekuane guaká shalda akuaxaldixa ishkaldukañguake, nakuishiña neyakue agatsekilde (Ajsh 17.5-10). Akna exa zalda Duwe ipanane kue shalda sha kakuiñgaba guatuka akualguakna, jalde kalta kagakauwane. Ai zhinik akldé akldénga aldunaxa kakuiyakshaldiamak (3.3-5), Duwe ipanane kueki mitsabé izhogakue shi kaxaldiyaldiamak (4.1-8), Duwe ipanane kueki ashuixaldiniki sakí aldaldaldixa shalda jiaga kakualdaldiamak (4.13-5.10) kagakauwane.

Ji, ji shalda guashi jalde kalta gaune:

1. Kasak misha ji shalda kakkbene ( 1.1)
2. Exa zaldakue Jatek “zeñ nzhakldék” kakkbene ( 1.2-10)
2. Pábulduja Tesaldónikaxa kagauneshi jiba atshane shalda ( 2.1-3.13)
3. Duwe ipananekuegaba mitsabé izhogakue ( 4.1-5.24)
  - a. Jatek akldunamak za izhogakue ( 4.1-12)
  - b. Duwe Jesú mokue naxaldixa ( 4.13-5.11)
  - c. Aldiwe guiyaba kakkbene ( 5.12-24)
4. Aldiwe kakkbene ( 5.25-28)

## Pábulduja Tesaldónikaxa zaldakuek kasak ne kalta kakuzgaune

<sup>1</sup> Maiñ Saldiñga netshi Jate Nauwijatetshi nekbine, Asukuá nauwijí Sáñkalda Duwe Jesú ipanamine, Tesaldónikaxa<sup>☆</sup> mishjuizhaldekakuañ, nas Pábulduk kalta miñkuzgauwatokuge. Ekí miñkuzgauwatoxaldatshak Silbano,<sup>\*</sup> Timuteyu na ekíga mimajañguxá ni mimakuák.

Nauwijate, [nauwijí Sáñkalda Duwe Jesú na,] atemajañ éegaba guañ mimajañgui, muldetua aldunaxa señgaba miñzukui shi mimezhokshí.

### *Exa zaldakue Jatek “zeñ nzhakldék” kakkbene*

<sup>2</sup> Mitsák Jatek mimakbeyañkaldogatshak, abá naldakí maiñ shalda “zeñ nzhakldék” mimakbeyal kalduka.  
<sup>3</sup> Akze, Saldiñga netshi Jate Nauwijatek kabiñmeyauxa ekí be mimezhgisekual kalduka: Maiñ Jatek alduna mishéñ zhinik, aldéñ za axazauwi mizhekue. Káguba

---

<sup>☆</sup> 1:1 1.1 Ajsh 17.1-9    <sup>\*</sup> 1:1 1.1 Ajsh 15.22. Silbanoga na Silda jiaga akuaka.

izhgajañgui mizhekuakna, miyaxazauwaldiamak jibat-shiji mizhekue. “Duwe Jesúki mokue kagik naxaldixaga shakldá” miñkualdi na, e shalda sha mimakuatshak jiaga, abeti mizhekue.

<sup>4</sup> Gaja Jate mimezhgajañguxakuañ, aldéñga ají minexaldiamak mimezhgakuxane minazuñkué. <sup>5</sup> Jinake ekí zuñkualdakí. Duwe Jesú zunekwane shalda kasak miñmeyañkaldogatshak, nauwijí múldigabak za miñmeyazháñkalde ne, Jatetshi Aldunaja ají kamak zunanazukuakshatshak zhinik na, “namak sha zuñgabé” aldunaxa muldeetua mimajañgushane nak. Guatshak exaga izhoxañkaldoguén, miñgaunegakualdiamak izhoñkalde miñkualdi nogashá.

<sup>6</sup> Akze, maiñki nauwijí Sáñkalda Duwe Jesú sha akuatshak jiaga sakí abetane agastuwi, nasuñ jiaga sha zunanakuatshak abetañkalde zuñgastuwi zhinik na amak izhogapanamine. Akna Duwe Jesú zunekwane kabiñmeyatshak, e mipangueni na atemajañ sha mimakuatshak jiaga, Jatetshi Alduna zeñ miñzukui izhomine.☆  
<sup>7</sup> Ekí mizhekuéñ zhinik na, saldiñga Duwe ipananekue exa Masedonia baxe zaldakueja, jai Akeya baxe zaldakueja miñkazatuatshakna “ekí izhogakue ne nakbatú” ajañguane.

<sup>8</sup> Akze, maiñ zhinik na nauwijí Sáñkalda Duwe Jesú shalda exa Masedoniaya, jai Akeyak zaldakueja aldupakaneni saldiñga zhekuauxaja jiaga aldupakanane. Akna saldiñga nekueja maiñ Jatek za muldetua alduna mishixa shalda kakwashegapanane nak, ai shaldaga kakbeyakue zuñgatsaldakí. <sup>9</sup> Ne kauwizhéñ zunake maiñ shalda ekí akuashi: Kasak miñkabizhal kaldeyatshak, namaklde shi kabiñkaldiyatshak muldetua zunanepanamine. Ekíga na,

---

☆ 1:6 1.6 Ajsh 17.5-9; 1Kt 4.16; 11.1

maiñki jigabá akldé akzé miyakilzabiyaldixa izhgitemine nalgué jiaga, akldé akzukualga noxabiñsá gui na, Jate niñkauwañki akldé akzamakga akzukui izhogapanamine. Ekíga na, Saldiñga netshi Jate namaklde, e za izhoshiñga izhuka za axazauwapanamine. <sup>10</sup> Ekibeñga na, “Jatetshi Asukuá Duwe Jesú mokue jékaldaxa zhinik mijá nagakuéñ” jañgui jiaktuwi izhogapanamine. Akze, Duwe Jesúki sha katshixa shalda Jate kaxañ atemañ guiyaba z<sup>u</sup>natuñshi guakuak nauwitsaldí shuigueni, Ajateja mokue izhgaldakshane nakldá.

## 2

### *Pábuldu exa jiba atshane*

<sup>1</sup> Gajakue, Duwe Jesú shalda miñmeyal kabiñkabizhatshak, axesé nuxa neyazháñkalde miñkué. <sup>2</sup> Exa neyagá kaldogueñgaki, kuíbuldu Pildipuxa ekíga Duwe shalda guaxañkaldoguéñ sha z<sup>u</sup>nakuatone, nalda z<sup>u</sup>ñkakuagatone miñkué. Nalguamakga mizhekueñka jiaga matshuwi nekueki Duwe z<sup>u</sup>nekuane shalda kaguldiji iyatamakuatshak jiaga, Nauwijate z<sup>u</sup>ñgaunegatshak z<sup>u</sup>ñzék naldakí amak miñmeyáñkalde. <sup>3</sup> Akze, Duwe z<sup>u</sup>nekuane shalda iyapanaldiamak kakuakáki naldagáldek zhinik, azhi sha z<sup>u</sup>ñnegaté noshi guaxañkálde. Ni mitsák naldagálde nuxa kágubajian kakzukuakualdiamak guaxañkálde miñkué. <sup>4</sup> Ekí ne, Jateja Asukuá z<sup>u</sup>nekuane shalda z<sup>u</sup>najañguamak guakldaz<sup>u</sup>naka z<sup>u</sup>natuwi z<sup>u</sup>nezhgakuxanamak za kakuaka. Akna, kágubak akldunamak shizhiyagába, Saldiñga netshi Jateja z<sup>u</sup>najañguamak za shi kizhixa. <sup>5</sup> Akze, aldéñki aldunaldi kajañgouaxa, z<sup>u</sup>ñnegatogouaxa, z<sup>u</sup>ñz<sup>u</sup>ziñka.

☆ 2:2 2.2 Ajsh 16.19-24; 17.1-9 ☆ 2:4 2.4 Ga 1.10

agatsaldi shi miñkaldiyazháñkalde miñkué. Ni jika matshuwi zũñkaldaldaldiamak jañguaté noshi nuxa shi miñkaldiyazháñkalde. Akze, Jatek naldi ekí jian izhoñkalde akualdi kalduka. <sup>6</sup> Ni mitsák káguba nuxa akldé zũñzukualdiamak niji, maiñ ni mielde shaxaldiyazháñkalde.

<sup>7</sup> Naldatshak, Duwe Jesújañga ají múldigaba guaxal zũnakaxanéñ zhinik zũñkabeti, amak zũñkatshakue miñsanekldazũnaka nane.\* Nalgué ekí agatsaldi shi miñkaldiyagába, jabakueja kauwiji somákue ishkajañgui numañ ishkatuamak, juañ akzaldi za miñkatsháñkalde.

<sup>8</sup> Akze, nasũñ atemajañ mimezhgajañgui na, Jateja Asukuá zũnekualdaldiamak gaxane zũñgatsauxa miñmendana zũñzeshi shi miñkaldiyañkalde. Ai za miñkatshanazũnaka jañguagába, kabimezhgajañguxaga sakí miñgaunekldazũñnegauxa jiaga atshakualdixa jañgui izhoñkalde. <sup>9</sup> Gajakue, ekí be izhgisekuaminaka: Jateja Asukuák zũnekuane miñmeyañkaldoguéñ, ji zũñgajueshká zũñkaldaldaldiamak zhiksekuá naldakí niuwisũñ, sesũñ jiba atshiji izhoñkalde. Jinake naldakí. Zũñaunegakue miñgatsé shalda jibañ miñzukuasũñ zũñzeguák.✠

<sup>10</sup> Guatshak Saldiña netshi Jateki Duwe ipanaminekuañ sakí miñkizhoñkalde zũnatuamakga maiñ jiaga ekí miñkualdi nogatuka: Muldetua Jatek akldunamak, jian za kizhogéñ zhinik na, ni meja sha atsháñkalde zũnakuagazháldiamak izhoñkalde.

<sup>11</sup> Akze, maiñ miñkueki, jatekueja kauwiji sukua giemikue axasanegamakbé ekí agatsaldi miñsaneshi naxañkalduka: <sup>12</sup> “Maiñ Jatetshi nekbinekuañki, sakí izhogakue mimajañguake auxabé mizhekualdaldí”

\* 2:7 2.7 Ezuakuejañki jai zhinik 7 izhokshi. ✠ 2:9 2.9 Ajsh 18.3; 2Ts 3.8

miñgakuañneshi, mimezhgastuñshi, aldunaxa mimakuiyakshi naxañkalduka. Akze, Jate naldiña miñsaneshi, aldéñ nugeñka zuxaita muñshíi zeñka mizhekualdaldiamak mimezhgakuxane nakldá.

<sup>13</sup> Akze, Jate kaxazguagauxa maiñ shalda “zeñ nzhakldék” kabimakbeñka. Jinake naldakí. Jatetshi múldigaba miñmeyañkaldogatshak, “ai múldigabaki Saldiña netshi Jatetshiga nukshí” jañgui mipanatshakna, “eñki kágubaja nuxa janaktune nukshí” miñnegazháne nak. Akze, eñki nahamakga Jatetshi múldigaba nak, eñkáñ zhinik maiñ Duwe ipanaminekuañ aldéñ akldunamak mizhekualdaldiamak miñgauneshi, mimayushixa.

<sup>14</sup> Akze, gajakue, maiñki mimisanákue Duwe shalda sha mimakuí, guiyaba mimatuñshatoguéñ, Duwe ipanane Juldeyaxa ishjuizhaldekakue kauwisaná juldiúkueja sha kakuí, guiyaba katuñshatoguéñ kagisanamakbé miñgisaldi naxabinuka. <sup>15</sup> Juldiúkuejaña na Duwe Jesú Saldiña netshi Sáñkalda izhogué jiaga akuaxá akuane. Ekibeña na, Jatetshi múldigaba naldiña zuxaitshixakue jiaga akuaxa, akuaxá akuanane. Ekíga na, nasuñ jiaga mashigaba Jatetshi múldigaba guagakualdiamak kaldeyatshak, eñka zhinik zunanagazaxaitsha zunanakuxa. <sup>16</sup> Ekueki Jatek akldunazhámak ajanashiji, kágubakue kaguldiji na, <sup>16</sup> kauwisaná naldagáldekue míngaki keyakualdaldiamak Duwe shalda kakbeji guanazuñnegak zuñkiyatamakui za ashekue. Ekí ajanashiji na, akldé akldéña sha ajanashijiñgaba zuxaita zalda ajanashéñ zhinik na, Jateja kaxañ atemajañ guiyaba katuñshapanaldieñ zexaldá na guapán.

☆ 2:14 2.14 Ajsh 17.5 ☆ 2:15 2.15 Ajsh 13.50; 14.2,5,19; 17.5,13; 18.12

*Pábulduja katundana akzeklde*

<sup>17</sup> Gajakue, kágubakueki maiñ na z<sup>u</sup>neshkajuekuane<sup>☆</sup> anuñka kaldoguëñ jiaga, aldunaldiñki maiñ nañga izhoxalga noñkalde. Akna mimatundana z<sup>u</sup>ñzeshiñgaba na, mokue mimatuál neyakualdiamak kama ilshanaz<sup>u</sup>ñnegauxa ilsháñkalde. <sup>18</sup> Akze, mimatuál nendana z<sup>u</sup>ñzegamakga, nas míngaki anuñka juizha mimatuál neyaldikuamak kama ilshaldatshak jiaga, jiséja neyañkaldáaldiamak z<sup>u</sup>ñgitamakuane. <sup>19</sup> Jinake mimatundana z<sup>u</sup>ñzegakí. “Maiñki Duwe Jesú muldetua agapa mineyaldixaga shakldá” kajañguatshakna, mitsá maiñ shalda sekuazhikshanaz<sup>u</sup>naka, atemajañ zeñ minaz<sup>u</sup>ñzukuxa nak. Akze, nauwijí Sáñkalda Duwe Jesú mokue kagik nagatshak, jiba z<sup>u</sup>ñgene z<sup>u</sup>ñgatuatshak maiñ shalda “janshibé naxatshamine tiuwi” z<sup>u</sup>ñmeyaldiamak<sup>†</sup> jikatuñka. <sup>20</sup> Akze, maiñ shaldaki mitsá sekuazhikshanaz<sup>u</sup>naka, mitsá atemajañ zeñ minaz<sup>u</sup>ñzukuxa nak nauwijí zeñ zaldaba nibiná.

## 3

<sup>1</sup> Ekí mimatundana z<sup>u</sup>ñzekaga abetaldaz<sup>u</sup>ñsá guñguakna, nauwihezua kuíbuldu Atenaxa abakualdixa jañgui na, <sup>2</sup> Timuteyu Duwek zhinik nauwikaja nekldega nauwitsaldí mimatuál miñgakaxañkalde. Aldéñki Jatek axazauñka, nas<sup>u</sup>ñ nañga Duwe z<sup>u</sup>nekuane shalda guashi jibake askuí atshixa nakna, akldéñga Duwe Jesúk za alduna ishál izhogakue mimakuiyakshi, aldunaxa kama mimakukshaldiamak miñgakaxañkalde.<sup>☆</sup> <sup>3</sup> Ekíki Duwe ipanamine shalda sha mimakuatogatshak jiaga, ijuldú naldakí agapa mineyaldiamak. Akze,

<sup>☆</sup> 2:17 2.17 Ajsh 17.5-10 † 2:19 2.19 Atshak bual ubiyane awatualdiamak sáñkaldak izhalshuxa agaxeka nane. <sup>☆</sup> 3:2 3.1-2 Ajsh 17.14-15

Duwe shaldaki sha z<sup>u</sup>nakualdixa janaz<sup>u</sup>ñgatune miñkué naldashá. <sup>4</sup> Jinake ekí miñkualdaka naldakí. Exa miñkabizhañkaldoguéñ, “sha z<sup>u</sup>nakuaquega zexaldixa niyó” anuñka juizháñga miñmeyatoñkalde nak. Kaiga z<sup>u</sup>nake miñmeyañkaldamak nuxa zegatuka miñkualdashá. <sup>5</sup> Akna sakí minuká nakualdana nakzekaga abetaldaksá guñguakna, mitsá Duwek alduna ishabinuka nakwashexaldiamak Timuteyu miñgakaxanuge. Jinake naldakí. Naski minjani na, “¿Saigabaki jisé miñsaneshi, Duwetshi jiúñguldak zhinik mimejulduksha guxá? Azhi amak mimejuldukshaldiák, ake, nas<sup>u</sup>ñ Duwe Jesú namak mijañgualdiamak jibatsháñkaldeki, ¿axesé nuxa naldaldixa ne?” minjani izhogukuák.

*Timuteyuja sakí alduká akbene*

<sup>6</sup> Ekí minjanatonuge ne, Timuteyu kaiga Tesaldónika zhinik nagatshak,<sup>☆</sup> maiñki muldetua Duwe Jesúk alduna ishalga, kágubakue kezhgajañgual mizhekue ni z<sup>u</sup>ñmé. Ekíga na z<sup>u</sup>nezhgajañgui, be z<sup>u</sup>nezhgisekualga minogák, nas<sup>u</sup>ñ mitsá mimatundana z<sup>u</sup>ñzegatogamakga, maiñ jiaga ekíga z<sup>u</sup>natundana miñzegatuka ni z<sup>u</sup>ñmé. <sup>7</sup> Akna Duwe shalda sha z<sup>u</sup>nakuí, guiyaba z<sup>u</sup>natuñshatogatshak jiaga, maiñki muldetua Duwek alduna ishalga minuká z<sup>u</sup>ñwashegatshakna, aldunaldi matshuwi z<sup>u</sup>nakuiyakshá ni miñgú. <sup>8</sup> Akze, nauwiji Sáñkalda Duwek za abá naldakí agapa neyabinuka z<sup>u</sup>ñwashegeñ zhinik na, aldunaldi kama gúxañkalde izhonaz<sup>u</sup>naka ni kitsbán.

<sup>9</sup> Akna maiñ atemajañ zeñ z<sup>u</sup>ñzukuiñgaba miñguakna Nauwijate kaxazguagatshak, auxaga maiñ shalda “zeñ nzhakldék” akbenaz<sup>u</sup>naka múldigaba tuakí ni kaldá. <sup>10</sup> Akna, niuwis<sup>u</sup>ñ, ses<sup>u</sup>ñ Jate kaxazguagauxa nas<sup>u</sup>ñ

☆ 3:6 3.6 Ajsh 18.5



naldi mimatuál neyakualdiamak zũngatsauxa agakuañ-  
neshi kizhuka. Ekíki Duwe Jesú miñgatsauxa alduna  
mishaldiamak, miyaki ishjuezhhalga minogéñ, amak miñ-  
gaunegakualdiamak.

<sup>11</sup> Akna, Saldiña netshi Jate Nauwijatek,  
Asukuá nauwijí Sáñkalda Duwe Jesúk miñkabizhal  
neyakualdiamak jiúñgulda janazũngaktuakue  
akshishi kizhuka. <sup>12</sup> Ekíga na, nasũñ zuxaita  
kabimezhgajañguamakbeña, nauwijí Sáñkaldaja  
aldéñ ipanaminekuañgaba akldé akldéña ataba  
atabañ miyajañgualdiamak, axautshikue jiaga  
mizhgajañgualdiamak mimakuiyakshakue mimakshishi  
kizhuka. <sup>13</sup> Ekíga na, aldunaldi mimakuiyakshakue  
mimakshishi kizhuka. Ekíki nauwijí Sáñkalda Duwe  
Jesú ají giemikue juizhi mokue nagatshak, Saldiña  
netshi Jate Nauwijatek asták miyaxaldagatshak, aldéñ  
akldunamak za izhomine, ni ji shalda miñgatsaldakí nuká  
mimatualdiamak. ✧ Ekíga shi naldí.

## 4

### *Jatek akldunamak izhoxa*

<sup>1</sup> Gajakue, nauwijí Sáñkalda Duwe Jesútshi nekbinéñ  
zhinik na kaigaki ekí miñgakuañnegakualdixa.  
Nasũñ exaga Jatek akldunamak izhogakue shi  
miñkaldiyañkaldamak izhogaté minogatshak jiaga, akldé  
akldéña ekí za zhekualdakue ni miñgakuañnekú. <sup>2</sup> Ekí  
miñkué, nauwijí Sáñkalda Duwe Jesúja sakí izhogakue  
miñmeyakualdiamak niuwi zũñgenamak miñsanekalde.

<sup>3</sup> Akze, Saldiña netshi Jateja ají minekuañki izhogakue  
mimajañguauxabé izhogakue ni mimajañgú. Ekíga na,  
ni mitsák mimisewá naldagálde na askuildék, ni mimijí

abuá na atsha guasúñzamak miyatshaldixa itshanakue mimajañguazhé. <sup>4</sup> Ne axaldáñ mimijí abuá izhgaksaneshi, numañ izhgatewa shitiyakue mimajañguashá. Ekí shi mitiyatshakna jian za mizhekue, axautshikue jiaga “janshibé mizhuká” miñkazatualdixa. <sup>5</sup> Ne, Jate me ne aksúñzekue zúnake zuxaita axautshi na askuildekldana kakzekája kaksanegamakbe, ekíga miñsanegakue itshanabináldi. <sup>6</sup> Maiñ Duwe ipanaminekuañgaba alduna ilshabinogéñ ni mielde ekí agatsaldi sha ishkatshijiñga, ezua tsewá na askuildegagába. Mielde ekí agatsaldi atshaldiák, mimeshkaldukshañkaldamakga Duwe Jesúja kaxañ atemajañ guiyaba tuñshaldixa nakldá.

<sup>7</sup> Akze, Jatejañki zúnezhgakugatshak, nusagatse jañguakualdiamak, nauwisewá naldagálde na askuildegakualdiamak zúnezhgakugazháne. Ne, ají giemikuañki mitsabé izhogakue nake, auxabé ají za izhogakualdiamak zúnezhgakuxane. <sup>8</sup> Akna, mieldeki sakí izhogakue shi miñkaldikuge ipanasúñ akzexaldiák, kágubak nuxa agipanasúñ akzegazháldi na, Saldiñga netshi Jatekga guana agipanasúñ akzexaldixa. Akze, aldéñga guana akldunamak izhogakualdiamak ají Aldunaki zúñgene nakldá.

<sup>9</sup> Guatshak Duwe Jesú ipanaminekuañ ataba, atabañ muldetua ajañguakue shaldaga kalta miñkuzgauwakue zúñgatsaldakí. Akze, Jate aldéñ naldiñga ataba atabañ ajañguakueki shi miñkaldiyá guane. <sup>10</sup> Ekí shi miñkaldiyanamak na, saldiñga Duwe ipananeakue Masedoniaxa zhekuauxa janshibé ni kezhgajañguabinók. Naldatshak gajakue, akldé akldéñga ekí ajañgual nogakue ni miñgakuañnexasñkaldók.

<sup>11</sup> Ekibeñga na, exa miñsanekaldamak mokue ekíga miñsanegakualdixa: Maiñ muldetua señgaba zhe noxa za mizhekualdaldixa itshani miñgualdí. Ekí izhoshi na,

axautshikue atshatuka za tu, ijaná izhoxabináldi. Ji miñgajuezhauxa miñkaldaldaldiamake mimixáuxaldak jibatshalga mizhekualdaldí. <sup>12</sup> Ekíki Duwe ipanazhánekueja sakí mizhekue miñgastuatshak miñkabetaldiamak, jika miñgajueshká miñgaxauwakue zaldazháldiamak.

*Duwe Jesú mokue naxaldixa*

<sup>13</sup> Gajakue, Duwe ipanane shuanekueki sakí aldaldaldixa miñsúñ naldakue mimajañguakí ni kaldá. Ekíki Duwe ipanazhánekueja ezua ishugatshak izhgaldaxaldixaga kaksúñ naldi na, iyabauwi matshuwi izhajana-makbé itshanabináldiamak. <sup>14</sup> Akze, nasúñki “Duwe Jesú shuiguenik Jateja mokue izhgaldakshanamak shakldá” kajañguamakga na, “Duwe Jesú mokue nagatshak, Jateja Asukuá ipana shuanaldixakue jiaga kezhgaldakshaldixa shakldá” kajañguxa.\*

<sup>15</sup> Akze, nauwíj Sáñkalda Duwe Jesúja zuñmeyamak na ekí kabiñmé: Aldéñ mokue nagatshak, mieldeke aldéñ ipañañkaldekuañ beñga kaldukakue misha, aldéñ iyapana shuanaldixakuek aksajañga Duwe akldabixal neyañkaldáaldixa. <sup>16</sup> Akze, nauwíj Sáñkalda Duwe aldéñ naldi jékaldaxa zhinik zabapanatshaga na, atemañ ni-uwi gexaldixa. Ekíga na, Jateja guaklde uldeñka akldé akzeja jiaga jaldáñ guaxaldixa, Jatetshi tata jaldáñ axazajuixaldixa. Ekí zegatshakna, Jateja Duwe ipana shuanaldixakue misha kezhgaldakshaldixa. <sup>17</sup> Gualdinik na aldéñ ipañañkalde mieldeke beñga kaldukakueki, shuane kezhgaldakshanekue juizhiñga, mauwixa nauwíj Sáñkalda Duwek akldabigakualdiamak zuñauldeyaldixa. Atshak zhinik na Duwe nañga izhoshiñga kizhogataná

---

\* 4:14 4.14 Ekí jiaga naldaka: “Duwe Jesú mokue kagik nagatshak Jateja Asukuá ipana shuanaldixakueki agapañga kauldaxaldixa.”

nakldá.✠ 18 Ekí shi miñkaldikuge shaldaki ataba atabañ zhinik, aldunaxa miyakuiyakshaldiamak zhikbeyalga minoxaldí.

## 5

1 Gajakue, Duwe Jesú ji ldiuwañ, mitsá zaldaldieñ naxaldixaga miñmeji kalta miñgakauwakue zũngatsaldakí. 2 Akze, ezua tusheka sesũñ mitsake mintushexal miñkaldaxaldixa miñsũñ minoxaldieñga nagamakbe, Duwe Jesúki zũñsũñ noxaldieñga mokue kagik naxaldixa miñkué.✠ 3 Ekíga na, munzhi somája mitsák ixauldaldixa aksũñ noxaldieñga ixauldapanamakbe, kágubakueki “kaiga zũna ni ji zũnakuá naldakí, señgaba zhe ni kaldók” aldegatoxaldieñ ubañga zũxaita kagisaldapanaldixa. Akna sakígaba guiyaba tuwak izhakuigakue atuazhaldixa nzha.✠

4 Gajakue, maiñ zũnake aldunaldi tuañ ilzukuamine izhoxabiñsá guamine nakna, Duwe Jesú za jiaktú minoxaldieñ miñkaldagatshak, tusheka mitsheñshakua-mak mimeshkaldakuikshazhaldixa. 5 Akze, maiñ Jatetshi nekbineke aldunaldi muñshí miñzekldéñ zhinik na jian ne atshakuamak miyatshixa nakna, niuwisũñ zalda miné. Ne, nasũña tuañ ilzukuaneke sesũñ sha ajanashamak atshakue zũngatsaldakí. 6 Akna, nasũñki ezukue aldunaxa kabanekue ashekuamakbé izhogagába, uba zhikldesháñkalde, be noshi, axaldáñ zhiksaneshi kuizizhoshí. 7 Akze, kágubakue tuañ zegatshak zegatuka iyajanagába axabaka. Ekíga na tuañ zegatshake, azatukakueki egaba azatushi alduka. 8 Ne nasũñ zũnake

---

✠ 4:17 4.14-17 Mt 24.30-31; Mlk 13.26-27; 1Kt 15.51-52 ✠ 5:2 5.2 Mt 24.43-44; Lk 12.39-40; 2Pe 3.10 ✠ 5:3 5.3 Is 13.8

muñshí z~~u~~nekilde kizhogakna, muldetua axaldáñ zhik-sanekalde kuizizhoshí. Ezua kaukshal neyatshak akiyasalshi guakuak shezhaxalda tshakue itshualdiyamakbeñga na, aldunaxa numañ atuwiñga ekí atshakue: Duwe Jesúk alduna ishalga, kágubakue jiaga kezhgajañgualga, \* “Duwe Jesúki muldetua auxaga nazikualdaldixa shakldá” jañgui, jiaktualga kuiznoshí.†

<sup>9</sup> Akze, Saldiña netshi Jateja kaxañ atemajañ guiyaba z~~u~~natuñshaldixa z~~u~~nezhgakugazháne, Asukuá nauwiji Sáñkaldá Duwe Jesúk z~~u~~nekualdaldixa niñkauwañki z~~u~~nezhgakuxane. <sup>10</sup> Duweki nauwitsaldí shuizhá guane, ekíki aldéñ mokue nagatshak, e ipañañkaldaldixake be nogakualdi, azhi shua naldakualdiák jiaga, zhualdusañga aldéñ na izhoshiña izhogakualdiamak.

<sup>11</sup> Ekí zexaldixa miñkuakna, Duwe muldetua alduna mishaldiamak ataba atabañ zhinik izhgauneshi, aldunaxa akuiyakshapanaminakga akldé akldéñga akuiyakshál minoxaldí.

### *Aldiwe guiyaba kakbene*

<sup>12</sup> Gajakue, nauwiji Sáñkaldaja aldéñ ipanamekuañ miñsanexaldiamak miñgitenekueki amak miñsaneshi, guiyaba jian ne miñmeyaldiamak kama izhalshijiñgaba ashekuakna, muldetua kaxabetakue miñgakuañnegakualdixa. <sup>13</sup> Akze, ekue miñgaunexaldiamak jiba ajanashiji izhukakue nakna akzé katuwi, kezhgajañgui miñgualdí. Maiñgabaga ezuak ezuak muldetua señgaba zhe minoxaldí.

<sup>14</sup> Gajakue, ekí jiaga miñgakuañnegakualdixa: Mielde Duwe ipananekeueki ni ji jiaga atshas~~u~~ñ, miwa kakzeshi

---

\* 5:8 5.8 Ep 6.13-17. Aikueki ezua kaukshal neyatshak akiyasalshi guakuak tabáxaldak izhapañguxa jana ne. † 5:8 5.8 Aiki akiyasalshi guakuak sáñkaldak izhalshuxa jana ne.

guaté mitualdiake, “anuñké nogakue miñgatsaldakí nibatú” keshkaldukshi miñgualdí. Azhi mielde aldunaxa jie akzegatukakueki kakuiyakshi miñgualdí. Azhi mielde aldunaxa auxaga kama aksúñzekueki kagauneshi miñgualdí. Mieldeki sakí izhogakue agatsamak ubańga izhogakí naldaldiák jiaga, abeti miñgualdí. <sup>15</sup> Mieldeki sha makualdiák, ma zhinik ekíga makiyushaldixa itshanagába. Akze, maiń Duwe ipanaminekuańgabaki janshizhe za ishkatshakue kama milshaldí. Ekíga na, saldińga kágubakue jiaga janshizhe kaxatshakue minshanaldí.

<sup>16</sup> Maińki niuwi akbaja naldakí zeń zalda mińzexal, ☆  
<sup>17</sup> Jate axazguaxal za mizhekualdaldí. <sup>18</sup> Sakígaba zegatoxaldiń jiaga, aldéń “zeń nzhakldék” akbeyal za mizhekualdaldí. Jinake naldakí. Maiń Duwe Jesú Zúnekualka ipanamineke, Jateja ekí izhogakue mima-jańguxa nak. ☆

<sup>19</sup> Jatetshi Alduna mińsanegatshak axaldukasúń mińzegagába. Ekí miyatshaldiák, guksé sanamakbe Jatetshi Alduna mińsaneka misańgualdixa. <sup>20</sup> Akna, ezuake ai Aldunajańga Jatetshi múldigaba naldińga nukshanamak mińmeyaldiák, “ji guaká mizek” jańguabináldi. <sup>21</sup> Amak mińgabeyaldiák, aiki Jatetshi Aldunaja guakshatuka, azhi eja guakshakí nuká guajakue. Akze, eja guakshatuka mitualdiák zúnake, ipani miñgualdí. <sup>22</sup> Ne sakígaba naldagálde mińgabeyaldiák zúnake ipanagába, shanek agajué minoxaldí.

<sup>23</sup> Saldińga netshi Jate aldunaldi seńgaba mikzexatshi jateki aldéńga ajíkuańki muldetua miñgatsauxa akldunamakga ají za shi mimezhokshí. Ekíga na, kaiga zhinik

---

☆ 5:16 5.16 Plp 4.4    ☆ 5:18 5.17-18 Alm 12.12; Ep 5.20; Kls 4.2

maiñ miñgatsauxa aldéñ na ishaldaldakuéñ,<sup>‡</sup> aldunak, abuák jiaga sha atshagába, jian minekue, ni miñgatsé mimakuák naldakí mimezhokshiñga, nauwijí Sáñkalda Duwe Jesú mokue naxaldieñka yo shi mimezhokshí.<sup>24</sup> Akze, Nauwijateki guakldanamak za atshixa izhogakna sakí mizhekualdaldixa mimezhgakuxane nake, amak mimezhokshaldixa nakldá.<sup>☆</sup>

*Aldiwe kakbene*

<sup>25</sup> Gajakuañ, maiñ zhinik Jatek z~~u~~nakbeyalga mizhekualdaldí. <sup>26</sup> Maiñ Duwe ipanaminekuañgaba mitsák miyatuatshak, ajañgui mual za mishkazguaxaldí.<sup>§</sup> <sup>27</sup> Nauwijí Sáñkalda Duwe Jesúja niuwi miñgé zhuxañga ekí niuwi miñgexaldikue: Jalde kaltaki saldiñga Duwe ipanaminekuañ minahauxa minukaldiamak ishkakzukuakshi miñgualdí.

<sup>28</sup> Nauwijí Sáñkalda Duwe Jesú atemajañ éegaba guañ mimajañgualga shi noshi. Ekíga shi naldí.

---

<sup>‡</sup> 5:23 5.23 Jatetshi múldigabaja kágubaki maigua nalda ne guaka. Galdiegu, zhaldiañki “espíritu, alma, cuerpo”. “Espíritu” eñki Jate na nauwijí aldunak ishaldaldakuéñ. <sup>☆</sup> 5:24 5.24 1Kt 1.9; 2Ts 3.3 <sup>§</sup> 5:26 5.26 Juldiú sanákueki ishkazakuaxaldiamake waxak nauwa alduzguxa.

## Jatetshi múldigaba

Kogi: Jatetshi múldigaba New Testament

Copyright © 2015 Wycliffe Bible Translators, Inc.

Language: (Kogi)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 11 Feb 2021 from source files dated 10 Feb 2021

7c5b6db6-c9a4-56c8-a822-4345cd7bafc0